



REGULAMENTO DE COMPETICIÓNS DA FEGATRI TEMPADA 2026

1.- A Federación Galega de Triatlón e Péntatlon Moderno (FEGATRI) promoverá na tempada 2026, a organización dos seguintes campionatos:

- Campionato Galego de
 - Dúatlon de Estrada
 - Dúatlon Cros
 - Dúatlon de Equipos
 - Dúatlon de Remudas
 - Dúatlon de Menores
 - Dúatlon Supersprint Cadete, Xuvenil e Júnior
 - Triatlón de Estrada
 - Triatlón Cros
 - Triatlón Supersprint Cadete, Xuvenil e Júnior
 - Triatlón de Estrada Estándar
 - Triatlón de Media distancia
 - Triatlón de Longa distancia
 - Triatlón de Equipos
 - Triatlón de Remudas
 - Triatlón de Menores
 - Paratriatlón
 - Ácuatlón
 - Cuádratlón
 - Triatlón de Inverno
 - Péntatlon Moderno

- Circuito Nada e Corre 2026
- XV Circuito de Triatlón de Menores
- VI Circuito Supersprint Cadete, Xuvenil e Júnior
- Liga de Dúatlon e Triatlón de Estrada

2.- **O Campión Galego e a Campioa Galega**, de calquera modalidade, terán que estar en posesión de licenza galega de tempada, e ben ter nacido en Galicia ou ben estar empadroados nun concello galego con antigüidade mínima de xaneiro da tempada anterior.

*O documento do padrón debe estar na Federación antes do remate da inscrición.

3.- Campionatos Galegos de Dúatlon e Tríatlon de Estrada

3.1- O Campionato Absoluto, Sub23, Júnior, Veterano I, II e III e de Clubs disputarase nunha proba única, cunha carreira masculina e outra feminina, totalmente independentes.

Con menos de 25 mulleres, poderá facerse a excepción e permitir disputar as competicións con dúas saídas, masculina e feminina separadas.

3.2.- O Campionato Galego de Dúatlon e Tríatlon Supersprint das categorías Cadete, Xuvenil e Júnior, disputaranse no campionato específico da modalidade e distancia.

3.3- A clasificación de clubs farase no Campionato Galego para aqueles que teñan 3 deportistas nesta proba.

3.4- Trofeos e Premios. A Federación Galega de Tríatlon e Péntatlon Moderno, outorgará os seguintes premios para o Campionato Galego Absoluto de Dúatlon e Tríatlon de Estrada:

Premios Económicos

	TRÍATLON	DÚATLON
1º/1ª	250,00 €	150,00 €
2º/2ª	150,00 €	100,00 €
3º/3ª	100,00 €	50,00 €

Medalla/ Trofeo

- 1º, 2º e 3º da Clasificación individual masculina e feminina de cada categoría.
 - 1º, 2º e 3º club en categoría masculina e feminina.
- a) Para ter dereito ao trofeo de Campión/a Galego/a o/a deportista debe de estar presente na entrega de premios, agás xustificación pertinente.
 - b) Ningún deportista cunha sanción aplicada, polo Comité de Disciplina da FEGATRI ou FETRI, na tempada anterior, terá acceso a premios.
 - c) As clasificacións faranse para as categorías masculina e feminina: Xuvenil, Júnior, Sub23, Absoluta e Veterana (I, II e III).
 - d) Premios e trofeos da Proba
Trofeos para 3 primeiros e primeiras clasificadas de cada categoría e tres primeiros clubs.

Cada organizador poderá poñer os premios económicos que considere.

4.- Criterios de participación nos Campionatos Galegos de Dúatlon e Tríatlon de Estrada.

As prazas tanto en categoría masculina coma feminina, outorgaranse do seguinte xeito:

- 40 primeiras persoas da clasificación do campionato da tempada anterior
- 40 primeiras persoas da clasificación do circuito do ano anterior
- 3 prazas por club para os tres primeiros clubs da clasificación da tempada anterior
- 2 prazas por club para o 4º, 5º e 6º club da clasificación do Campionato Galego da tempada anterior
- 3 prazas por club para os tres primeiros clubs do ranking da tempada anterior
- 2 prazas por club para o 4º, 5º e 6º club do ranking da tempada anterior
- 1 praza por club para o 7º, 8º, 9º e 10º do ranking da tempada anterior
- 2 prazas da Dirección Técnica para outorgar a deportistas elite de nivel internacional
- O resto de prazas que acolla o circuito, ata un máximo de 200, serán outorgadas por orde de inscrición

5.- Invitacións da Dirección Deportiva para o Campionato Galego

- a) A Dirección Técnica da FEGATRI disporá de 2 invitacións masculinas e 2 femininas, para causas excepcionais, que poderá dar ou non, avaliadas as solicitudes presentadas.
- Será requisito imprescindible para optar a estas invitacións ter participado, nos últimos dous anos, nunha proba World Triathlon

A solicitude deberá ser motivada e presentada por escrito no prazo establecido.

6.- Liga Galega de Dúatlon e Tríatlon de Estrada

6.1- A Liga Galega de Dúatlon e Tríatlon de Estrada organizarase con probas de diferentes modalidades co fin de fomentar a igualdade de oportunidades, competitividade e crecemento do tríatlon en Galicia.

6.2- As ligas constarán de entre 2 e 5 probas. Podendo este número axustarse por condicións excepcionais a criterio da Comisión Delegada

DÚATLON

- 3 Dúatlons de estrada sendo un deles o Campionato Galego
- 1 Contra o reloxo por equipos
- 1 proba de calquera modalidade que un organizador solicite engadir (ex. remudas, parellas...)

TRÍATLON

- 3 Tríatlons de estrada sendo un deles o campionato galego
- 1 Contra o reloxo por equipos
- 1 proba de calquera modalidade que un organizador solicite engadir (ex. remudas, parellas,...)

6.3- Para participar en probas de Liga será necesario estar en posesión da licenza federativa da tempada vixente ou tramitar licenza temporal de 1 día.

6.4- De cara a facilitar a inscrición puntual de deportistas que non aboem os dereitos de Liga e só queiran participar nalgunha proba específica, establecerase un prorrateo cunha cota de 20€ por deportista e proba na que participe, a excepción dos Campionatos Galegos. Dando así, opción a participar tanto a deportistas galegos coma doutras comunidades ou con licenza temporal. Esta cota prorrateada de 20€ sumarase á inscrición da proba establecida polo organizador e/ou á licenza temporal de se-lo caso. En ningún caso, estes deportistas/clubs puntuarán para a Liga.

6.5- O punto anterior só será de aplicación á proba que conforme e puntúe para a Liga. No caso de facer unha proba *Open* aberta no mesmo evento, pero que non se puntúe para a Liga, a participación será libre sen ningunha cota a maiores da de inscrición e licenza temporal de ser o caso. (*ex. Proba Open contra o reloxo por equipos. Non puntúa na Liga e tampouco leva ningunha cota engadida*).

6.6- Establécense unhas cotas de dereitos de inscrición na Liga de Dúatlon e Tríatlon de Estrada:

6.6.a) A cota de inscrición na Liga será de 300€ para clubs e de 100€ para independentes.

6.6.b) A cota de inscrición na Liga dará dereito a inscribirse en calquera das súas probas ou en todas.

6.7- Outras normas de organización das probas de Liga

6.7.a) Nas probas de Liga recoméndase, como mínimo, unha carreira feminina e outra masculina. Excepcionalmente, poderá autorizarse unha única proba con dúas saídas diferenciadas de acordo a regulamento. Segundo as necesidades técnicas do circuíto, previsións de inscricións e o tipo de saídas autorizadas, a proba masculina poderá disputarse en dúas carreiras, unha delas cun tempo de corte (2ª), podendo coincidir esta coa feminina, cuxa saída se establecerá de xeito separado de acordo aos tempos establecidos na regulamentación vixente.

6.7.b) No caso dunha única carreira masculina, promoverase a celebración dunha proba feminina separada salvo autorización expresa. O/a Delegado/a Técnico/a en función do número de inscritas e necesidades do circuíto poderá autorizar igualmente unha coincidencia con saídas separadas que garanta a disputa limpa da proba feminina incrementando o número de xuíces necesario para o seu control.

6.7.c) Recoméndase a celebración dunha proba Supersprint, cunha saída específica para cadetes, xuvenís e júniors de cara a promover a participación destas categorías.

6.8- Clasificacións en cada proba.

6.8.a) Clasificación individual masculina e feminina para categoría Absoluta (xeral) e para as categorías Xuvenil, Júnior, Sub23 e Veteranos I, II e III.

6.8.b) A clasificación masculina será única de cara á súa puntuación na Liga. No caso de dúas carreiras, os deportistas da carreira *Open (sen tempo de corte)* colocaranse a continuación da carreira con tempo de corte, por orde, segundo o seu tempo.

6.8.c) Clasificación por clubs, masculina e feminina. Para puntuar como club é necesario ter licenza por ese club. Realizarase sobre a clasificación final individual. *(Segundo a normativa de licenzas non se pode cambiar de club durante a tempada)*

c.i) En cada proba sumaranse os tempos dos tres mellores deportistas de cada club na clasificación masculina, e das tres na feminina. Vencerá o club que menos tempo sume.

c.ii) En caso de empate a tempos, vencerá o club que clasificara primeiro ao seu mellor deportista.

6.9- Clasificación xeral da Liga

6.9.a) Ao final de cada liga de dúatlon e triatlon haberá unha clasificación por clubs e outra individual

a.i) Probas individuais:

En cada proba en función da clasificación, outorgarase a cada deportista e club unha puntuación de acordo á súa posición final, segundo a seguinte táboa:

a.ii) Probas por equipos

Serán puntuables para a clasificación final de clubs da liga.

DEPORTISTA CLUB	Proba 1	Proba 2	Proba 3	Proba 4	Proba 5	*Puntos
A	1º	2º	1º	3º	3º	10 pt
B	2º	3º	*(300p)	4º	1º	310 pt
C	3º	*(300p)	*(300p)	5º	2º	610 pt
D	4º	*(300p)	*(300p)	*(300p)	4º	908 pt

Teranse en conta tódalas puntuacións de cara a primar a participación nas probas

- En caso de empate, vencerá quen máis primeiros postos acade, máis segundos,...
- De seguir o empate vencerá o que mellor posto acade na última proba

6.10- Trofeos e premios

6.10.a) En cada proba de Liga entregaranse como mínimo tres trofeos ou medallas a cada categoría masculina e feminina participante, no caso das probas individuais: Absoluta, Xuvenil, Júnior, Sub23 e Veterano I, II, III, así coma, aos tres primeiros clubs masculino e feminino da clasificación xeral.

6.10.b) Premios da Liga

Os premios económicos da Liga outorgaranse aos clubs de acordo á seguinte táboa:

	TRÍATLON	DÚATLON
1º Club Masc./ Fem.	1.000,00 €	450,00 €
2º Club Masc./ Fem.	750,00 €	375,00 €
3º Club Masc./ Fem.	450,00 €	225,00 €
4º Club Masc./ Fem.	300,00 €	150,00 €
5º Club Masc./ Fem.	150,00 €	75,00 €

6.10.c) Ningún deportista ou club cunha sanción aplicada polo Comité de Disciplina da FEGATRI, na tempada vixente, terá acceso a ningún tipo de premio.

7- Outros Campionatos Galegos, Circuitos e probas autorizadas pola FEGATRI

En tódolos Campionatos Galegos farase a clasificación individual e de equipos.

7.1- **Campionatos Galegos Individuais.** Permítese participar a deportistas con licenza temporal autonómica de 1 día. En ningún caso optarán ao título do Campionato Galego pero si poden acceder ao premio de cada proba. A clasificación masculina e feminina, farase para as categorías Absoluta, Júnior, Sub23 e Veterana 1, 2 e 3 masculina e feminina, salvo os regulados de xeito expreso con outras categorías.

7.2- **Campionato Galego Individual de Ácuatlon.** A clasificación farase para as categorías Absoluta, Sub23 e Veterana I, II e III masculina e feminina. Permítese participar a deportistas con licenza temporal autonómica de 1 día, pero en ningún caso optarán ao título do Campionato Galego.

7.3- **Triatlon Cros.** Farase a clasificación para categoría Júnior, Sub23, Absoluta e Veterana I, II e III masculina e feminina. Permítese participar a deportistas con licenza temporal autonómica de 1 día. En ningún caso, optarán ao título do Campionato Galego.

7.4- **Dúatlon Cros.** Farase a clasificación para categoría Júnior, Sub23, Absoluta e Veterana I, II e III masculina e feminina. Permítese participar a deportistas con licenza temporal autonómica de 1 día. En ningún caso, optarán ao título do Campionato Galego.

7.5- **Promoción probas contra o reloxo por equipos.** Para favorecer a promoción e participación feminina en probas de contra a reloxo por equipos, as entidades organizadoras, se así o desexan, poderán incluír unha competición popular de equipos mixtos.

- Os equipos estarán compostos por un máximo de 6 e un mínimo de 4 deportistas de calquera xénero. Debendo contar ao menos 2 mulleres.
- Os/as compoñentes poderán pertencer ao mesmo ou a diferentes clubs
- A puntuación do equipo, nesta clasificación mixta, virá dada polo cuarto/a compoñente. Sendo obrigatorio para non ser eliminado que en todo momento

entre os 4 compoñentes do equipo permanezan 2 deportistas femininas e 2 deportistas masculinos.

- O resto de normas da competición serán as da contra o reloxo por equipos recollidas no regulamento oficial de competición.

7.6- Tríatlon, Dúatlon e Aquabike de Longa e Media Distancia. Só se fará a clasificación para as categorías Absoluta e por Grupos de Idade masculina e feminina. Permítese participar a deportistas con licenza temporal autonómica de 1 día. En ningún caso, optarán ao título do Campionato Galego.

7.7- Circuito “Nada e Corre” [Anexo Normativa Específica](#)

7.8- Circuito “Tríatlon de Categorías Menores” [Anexo Normativa Específica](#)

7.9- Remuda Mixta de Tríatlon de Menores. A organización dunha proba de remudas mixtas será obrigatoria no Campionato Galego e recomendable no resto de probas de circuíto de menores.

- A remuda estará composta por 4 deportistas: 1 deportista Alevín feminina, 1 deportista Alevín masculino, 1 deportista Infantil feminina e 1 deportista Infantil masculino .
- Cada deportista realizará un tríatlon sobre as seguintes distancias.- 100 m natación - 2 Km ciclismo-500 m carreira a pé.

O resto de normas a aplicar serán as recollidas no regulamento oficial de competicións para esta modalidade.

7.10- Remuda Mixta de Dúatlon de Menores. A organización dunha proba de remudas mixtas será obrigatoria no Campionato Galego e recomendable no resto de probas de menores.

- A remuda estará composta por 4 deportistas: 1 deportista Alevín feminina, 1 deportista Alevín masculino, 1 deportista Infantil feminina e 1 deportista Infantil masculino .
- Cada deportista realizará un tríatlon sobre as seguintes distancias.- 400 m carreira a pé - 2 Km ciclismo- 200 m carreira a pé.

O resto de normas a aplicar serán as recollidas no regulamento oficial de competicións para esta modalidade.

7.11- Remuda Mixta de -Ácuatlon de Menores A organización dunha proba de remudas mixtas será recomendable tanto no Campionato Galego coma no resto de probas.

- A remuda estará composta por 4 deportistas: 1 deportista Alevín feminina, 1 deportista Alevín masculino, 1 deportista Infantil feminina e 1 deportista Infantil masculino .
- Cada deportista realizará un triatlón sobre as seguintes distancias.- 50 m natación- 500 m carreira a pé.

O resto de normas a aplicar serán as recollidas no regulamento oficial de competicións para esta modalidade.

7.12- “**Dúatlon de Categorías Menores**”

- No Campionato Galego de Dúatlon de Menores poderá engadirse a categoría Prebenxamín.
- Nas categorías Prebenxamín, Benxamín e Alevín estarán permitidos os mini freos engadidos ao guiador
- En Dúatlon de Menores con cronometraxe manual, só da meta, permitirase o uso dun único dorsal collido polas catro esquinas (con calquera medio de suxeición que o garanta) colocado visible ao fronte dos deportistas.

En canto ao *drafting* estarase ao indicado polas normativas vixentes en cada momento, en todo caso en saídas conxuntas masculina e feminina a norma vixente non fará diferenza entre xéneros.

- Saídas separadas por categoría e xénero en caso necesario. A criterio regulamentario e valoración do DT co comité galego de xuíces.

7.13- **Campionato Galego Súper sprint de Dúatlon e Triatlón Cadete, Xuvenil e Júnior**

Haberá clasificación masculina e feminina para as tres categorías. Realizaranse saídas separadas por xénero. Haberá clasificación xeral de clubs segundo o regulado para o circuíto súper sprint.

- 7.14- **Outras Probas Avaladas pola FEGATRI.** – Para as probas autorizadas pola Federación, que non sexan de Circuíto ou Campionato Galego, seguiranse os mesmos criterios que para as de circuíto en materia de seguridade e niveis básicos, excepto o custe da inscrición que será libre.

8- Normas xerais das probas:

- 8.1- Información da proba. Cada organizador ten a obriga de informar a tódolos clubs, como mínimo, con quince días de antelación das normas da súa proba (horarios, lugar, custe, inscricións etc.). No caso de suspenderse a proba, ten a obriga de informar con ao menos un mes de antelación de cara a posibilitar que a Xunta Directiva busque unha alternativa. Enviando anticipadamente, ao menos unha semana antes da apertura de inscrición, o regulamento á FEGATRI para a súa supervisión e publicación na web.

8.2- Supervisión previa. Cada proba pasará o visto bo dun Delegado Técnico, xuíz/a do Colexio de Xuíces e Oficiais da FEGATRI, que pode chegar a suspender unha proba se esta non reúne as condicións de seguridade ou de nivel deportivo suficientes. O 1º informe débese facer con suficiente antelación á proba, para que, en caso necesario, se arranxen as deficiencias observadas. Os custes da supervisión serán asumidos polo organizador segundo as tarifas vixentes aprobadas.

8.3- Inscricións

8.3.a) Os menores das categorías (Prebenxamíns, Benxamíns, Alevíns e Infantís) non pagarán inscrición nas súas probas. Nas probas nas que non se aboe inscrición, no caso de que os deportistas se inscriban e non acudan serán penalizados a través do seu club co abono de 5 euros por non presentado. Esta penalización será reembolsada pola FEGATRI ao organizador e facturada aos clubs.

- As inscricións nas probas avaladas pola federación, inferiores á media distancia deberán realizarse a través da plataforma de inscricións federativa, coa excepción de probas organizadas directamente por Organismos e Entidades Públicas, onde se permitirá que as realicen a través das súas plataformas privadas. Neste caso deberá enviarse co formato Excel nas seguintes columnas DNI/ nome/ apelidos/ data de nacemento/ club/categoría que se deberán utilizar igualmente no reporte do arquivo de clasificacións.

- O prazo de inscrición rematará por norma xeral o martes previo á proba, ás 23:59 h. No caso de que se remate antes desta data o organizador deberá reflectilo expresamente no regulamento.

- Nas competicións por remudas e equipos poderán engadirse 2 reservas á inscrición de cada equipo. Inscrición que se pechará igualmente o martes previo á proba. Os cambios nos equipos, entre deportistas xa inscritos, tanto titulares coma suplentes poderán facerse ata o xoves ás 16:00 h.

8.4- Xuíces e persoas colaboradoras

- a) En cada proba haberá como mínimo, un Delegado Técnico, un xuíz árbitro, sete oficiais e catro colaboradores adxuntos. Se pasa de cen participantes, haberá como mínimo oito oficiais. O número definitivo de oficiais virá determinado polo Delegado Técnico acorde ás necesidades e características da proba e dos seus circuitos.
- b) Os custes do colexio de xuíces, canon e actuacións serán facturados ao organizador segundo as tarifas vixentes aprobadas para a tempada. A Federación será a encargada de aboar os importes ao oficiais pola súa actuación a principios do mes seguinte á celebración da proba, por transferencia bancaria, podendo agrupar as arbitaxes acumuladas de cada mes.
- c) No caso de dar tres ou máis voltas a un circuito, o organizador terá que poñer como mínimo dúas persoas "conta-voltas" ao servizo dos xuíces. A organización será responsable de asegurar que os deportistas cubran, nos puntos afastados do circuito, correctamente o mesmo.
- d) Haberá un local achegado, cuberto e habilitado para reunirse os xuíces e o xurado de competición da proba, por se fora necesario, cunha mesa, unha silla e toma de corrente.

8.5- Clasificacións

- a) As clasificacións de cada proba estarán confeccionadas no prazo máis breve posible. A clasificación definitiva cos tempos dos participantes, deberá ser accesible para os clubs en canto estea confeccionada. Para posteriores reclamacións seguirase o marcado nos regulamentos da Federación Española. Publicaranse antes de 24 horas na web da FEGATRI.
- b) Para confeccionar as clasificacións individuais finais dos campionatos galegos non se terán en conta os deportistas e/ou clubs con ficha doutra CC.AA. Si se terán como postos válidos ós deportistas independentes con licenza galega.
- c) As clasificacións deberán ser confeccionadas polo organizador, designando unha persoa responsable para a súa elaboración na proba e enviadas á FEGATRI para a súa publicación, seguindo o estándar ORIS acorde ao Regulamento Oficial de Competicións. Unha clasificación provisional deberá ser mecanizada para a súa publicación na proba, de cara ao cumprimento dos procedementos de reclamación. Así mesmo enviarase unha clasificación en Excel á FEGATRI na que se incluírá o DNI dos participantes para o seu tratamento.

8.6- Entregas de Premios.

Os/as deportistas e/ou clubs que non estean na entrega de premios (salvo causa de forza maior) non os recibirán, e serán sancionados por desconsideración ao organizador e ao resto dos deportistas (segundo os estatutos en vigor). Aquel deportista ou club que non estea presente na chamada ao podio será sancionado con 25 e 50 euros respectivamente e non poderá participar ata o seu abono. Este artigo será incorporado ó regulamento de cada proba de adultos. Será labor do DT de cada proba recoller os datos dos infractores.

8.7- Folla de valoración de probas

A FEGATRI disporá dunha folla de valoración de probas, tódolos clubs poderán puntuar ao final da competición o nivel da proba. Esta folla utilizarase á hora de adxudicar novas organizacións de probas e para mellorar a tempada seguinte. En dita puntuación terase en conta a seguridade da proba, os servizos para o deportista (vestiarios, información xeral, premios etc.). A puntuación irá de 0 a 10 puntos, se máis da metade de clubs participantes suspenden a un organizador non entrará a súa proba na liga da tempada seguinte (a maiores deberá superar as probas que o Comité Técnico considere necesarias). As puntuacións para ser válidas deben ir asinadas polo delegado de cada club.

8.8- Outras normas

- a) En Dúatlon, con cronometraxe manual, levaranse dous dorsais collidos polas catro esquinas cada un (no peito e nas costas) e non poderán dobrarse. Non cumprir esta norma levará consigo a descualificación. Os dorsais deberán ser dun material que non se estrague coa auga. Con cronometraxe electrónica poderase levar igual que en Tríatlon (con goma ou porta dorsal acorde).

- Contar cun sistema de cronometraxe.
- Dispoñer de duchas e vestiarios nas proximidades da proba.
- Dispoñer dun sistema de megafonía e locución.
- Contar cun plan de seguridades e evacuación
- Dispoñer de avituallamento líquido en distancia olímpica ou inferior e avituallamento líquido e sólido en media distancia ou superior durante a proba. Avituallamento líquido e sólido na pos meta para todas as distancias.

2.2. Criterios puntuables

- Historial da proba:

> 10 anos	4 puntos
7 < anos ≤ 10	3 puntos
4 < anos ≤ 7	2 puntos
2 < anos ≤ 4	1 punto

- Coste inscrición

Gratuíta	5 puntos
≤ 6 euros	3 puntos
≤ 10 euros	2 puntos
≤ 15 euros	1 punto

- Premios en metálico

≥ 3500 euros	5 puntos
2500 < euros ≤ 3500	4 puntos
1500 < euros ≤ 2500	3 puntos
1000 < euros ≤ 1500	2 puntos
600 < euros ≤ 1000	1 punto

- Valoración das edicións pasadas por parte dos participantes

Nota = 10	5 puntos
9 ≤ nota < 10	3 puntos
8 ≤ nota < 9	2 puntos
7 ≤ nota < 8	1 punto

- Valoración das edicións pasadas por parte do equipo arbitral

Nota = 10	5 puntos
-----------	----------

9 ≤ nota < 10	3 puntos
8 ≤ nota < 9	2 puntos
7 ≤ nota < 8	1 punto

- Saídas engadidas á proba principal

Saída popular	+ 1 punto
Saída Nada e Corre/ Proba Escolar	+ 2 puntos
Saída Paratríatlon	+ 2 puntos
Carreiras por sexo totalmente separadas*	+ 3 puntos

*Unicamente se optará a estes puntos cando a suma de puntos neste epígrafe sexa igual ou superior a 3 puntos.

- Sistema de cronometraxe

Tempos diferenciados nos 5 segmentos (incluíndo transicións)	+ 1 punto
Tempos por paso de volta na natación*	+ 1 punto
Tempos por paso de volta no ciclismo*	+ 1 punto
Tempos por paso de volta na carreira*	+ 1 punto
Información en tempo real	+ 3 puntos
Streaming da proba	+ 3 puntos

*Sempre e cando o número de voltas do segmento sexa 2 ou máis.

3.- Outras normas que cumprirán as probas do calendario FEGATRI

3.1.- Todas as probas do calendario FEGATRI terán obrigatoriamente un seguro específico de responsabilidade civil

3.2 Todos os participantes estarán cubertos por un seguro de accidentes a través da a través da licenza anual ou no seu defecto pola licenza temporal de un día (esta será tramitada a través da FEGATRI).

3.3 Os seus percorridos serán visados por un Oficial Nivel II ou superior e/ou autorizado pola Federación..

3.4 A proba cumprirá co resto de requisitos legais establecidos.

4.-Probas Escolares

As probas escolares serán todas con circuío pechado, terán que ser os mesmos revisados por xuíces da Federación. En cada proba haberá como mínimo 5 xuíces por proba. O número de xuíces/oficiais será determinado polo Delegado Técnico ás necesidades da proba e circuíos.

5.- Probas non Autorizadas.

A FEGATRI non obrigará nin esixirá aos xuíces e xuízas con licenza acudir a ningunha proba que non sexa oficial no calendario FEGATRI, sen embargo, poderase sancionar aos xuíces que exerzan como tal, en probas non autorizadas ou recoñecidas pola Federación . Isto será de aplicación para os organizadores con licenza federativa.

6.- Campionatos de Paratriatlón das distintas modalidades .

Seguiranse as recomendacións e regulamentos da Federación Española de Tríatlón, en todo o relativo á organización de probas e participación de paratriatletas clasificados, tendo en conta os acordos da Asemblea Xeral da Federación Galega de Tríatlón e Péntatlón Moderno de data 25/04/2017

<https://fegatri.org/wp-content/uploads/2017/05/Acta-aseblea-Xeral-25-04-2017.pdf>

7.- Péntatlón Moderno

A Federación promoverá a organización dun Campionato Galego de Péntatlón Moderno para categorías menores (Benxamín, Alevín, Infantil, Cadete e Xuvenil) incluírá as probas de tiro/combinada, natación e carreira a pé. Igualmente promoverá a organización das distintas especialidades.

8.- Canons Federativos

- a) Probas populares/abertas de distancia inferior á media avaladas pola FEGATRI 140,00€
- b) Para as probas de Media e Longa Distancia o canon a aboar á Federación irá en función do número de participantes na proba segundo a táboa seguinte:

Nº PARTICIPANTES	CANON (€)
ATA 100	100,00
DE 101 A 250	150,00
DE 251 A 500	400,00
DE 501 EN DIANTE	600,00

- c) Polos Campionatos Galegos de Dúatlón e Tríatlón de Estrada individuais aboarase un canon á Federación de 250,00€
- d) Polo resto de campionatos oficiais aboarase un canon á Federación de 150,00€.

- e) Canons de probas nacionais e internacionais.-
- Noutras probas de carácter estatal organizadas por calquera club que libremente o solicite e que no convenio que asine sexa necesario a participación da FEGATRI para figurar no convenio coa Institución Pública que patrocine, o canon será de 500,00€ (neste caso só figurará a FEGATRI si é estritamente necesario).
 - Se os campionatos son dous en días consecutivos, o canon será de 600,00€.

9.- Probas Oficiais da Federación Galega de Tríatlon e Péntatlon Moderno (FEGATRI)

As probas oficiais organizadas pola Federación Galega de Tríatlon e Péntatlon Moderno son todos os Campionatos das modalidades de Tríatlon e Péntatlon Moderno a celebrar en Galicia que figuren no seu calendario oficial aprobado en Asemblea Xeral.

Para todas estas probas a Federación abrirá un prazo de organización das mesmas, que se regulará e convocará anualmente, a tódolos organizadores con licenza en vigor na FEGATRI.

Tódalas dúbidas que presente este regulamento ao longo da tempada serán resoltas pola Comisión Delegada, quen podería convocar, de así consideralo, unha Asemblea Xeral Extraordinaria da Federación. Para casos de extrema urxencia, decidirá a Xunta Directiva.

**Para todo aquilo no recollido neste regulamento aplicarase o Regulamento Oficial de Competicións da FETRI.*